

ADVIS
DV GROS GVILLAVME,
sur les affaires de ce temps.

no. 7

Avec vne remonstrance à Messieurs
qui se meslent de tout.



A PARIS,

M. DC. XIX.



ADVIS DV GROS
GVILLAVME.

Sur les affaires de ce temps.

Aux Bourgeois de Paris.

HOla Bourgeois ! Hola c'est assez mangé de poix : ne cesserez-vous jamais de manger des espinars ? vous vous nourrissez d'herbes cōme les oysons, & si ie pèse qu'apres vostre mort vous vous farcirez le cul ainsi cōme eux, mais que vous ayez la gorge coupee ? A quoy pensez-vous ? parbieu, pendant que vous faictes rostir des harancs, il y en a qui vous taillent des croupieres : il y en a qui s'aprestent à vous empescher bien de manger du pain de Gonnelle, encore basque si le beurre de Vanue ne manque point ; ie voy quelque renfronné, aussi suffisant comme monsieur la Fontaine mon maistre, qui barbouillant entre ses dents s'estonne de quoy ie me

mesle: il a grand tort de me blasmer de-
 uant que de me cognoistre: sçait il pas
 bien que s'il ne veoit plus de bled à Pa-
 ris, que la farine seroit bien chere: Et
 puis de quoy me barbouillerois-je? d'an-
 cre? Par dieu chacun m'appelleroit
 coyon, j'aymerois mieux auoir mon vi-
 sage enluminé de merde. Au reste vous
 estōnez vous si i'ay de l'interest au beur-
 re de Vanue, ma foy si ie ne mangeois
 que de l'huille en Careme vous ne ver-
 riez pas des farces à si bon marché, ie
 vous ferois payer le restreissement de
 mon pourpoint: Car le mesme qui con-
 tient vn gras Guillaume, en tiendrait
 bien quatre maigres, & huit au bout.
 Ouy ouy i'y ay de l'interest, si on s'amu-
 soit à aller yurongner aux portes, adieu
 l'Hostel de Bourgogne: pour moy ie
 ne suis point seditieux, j'aymerois mieux
 gagner quatre escus par iour, & boire
 tout mon saoul à la Croix verte durant
 la paix, que de mourir de froid sous vne
 tente en temps de guerre. Que diable
 pensez-vous que ce soit que la guerre?
 vous voudriez bien le sçauoir, mais ie
 ne sçay si ie dois vous le dire. A boire:

car la verité consiste au vin , & ma science ne gist qu'en la bouteille , & puis ie vous discoureray sommairement de ce qu'il me semble de la guerre & de la paix.

Premierement vous parlez de la guerre. Distingo. Il y a plusieurs sortes de guerres , & pensez vous que toutes les guerres qui se font au monde ressemblent aux guerres du Marquis d'Ancre , on vous aliez aux portes ioier à la courteboulle , vous battre à coups de poings , & disputer contre les pots & les bouteilles : Il est vray que quand vous retourniez en vos maisons vous estiez plus fors , pour ce que pendant que vous faisiez sentinelle, vos femmes faisant sentinelle à cul leué , vous armoient mieux que ne sont les Cerfs dans le bois , & de cornes plus aduantageuses: Mais ie n'appelle pas guerre ciuile qui se faict du cul & de la bouche , c'est guerre quand on se bat à coups d'espees, & que ces grosses boules de canon emportent les torses des personnes; on me pourra dire, vous n'avez non plus de courage que les autres : vous ne receuez point de coups?

ie reçoÿ des pitoies de par dieu qui sont
bien meilleures, & puis mon corps est
muny de tant de perfections, que ce ne
seroit qu'amuser le tapis d'aller au com-
bat, parce que mille espees ne le peuvent
trouer; il est vray que tant plus vn
mur est espais plus il resiste, & mon ven-
tre farcy de soupe est à l'espreuue du pi-
stollet; pour ma teste, c'est à faire à des
cerueaux legers de se laisser emporter
aux boules de canon, pour moy ma cer-
uelle est trop lourde, & mon imagina-
tion trop solide pour s'esbranler à si pe-
tit vent; aucunes fois i'ay esté à six lieues
loing de Senlis quād les Ligueux Passie-
geoient, & qu'on tiroit tāt de canon que
tous les diables, sans que neantmoins
cela m'aye peu perdre, ny seulement in-
terrompre mon premier somme. Sçauéz
vous quand ie suis bien tost resueillé,
c'est lors que ie me suis amusé à iouer la
nuict, & qu'il m'arriue apres auoir bien
desjeuné, que ie m'endors sur le midy:
alors on commence à remuer les plats,
dont le doux cliquetis me batant aux
oreilles me resueille aussi tost, pour faire
vn sault perilleux du liēt à la cuisinc; il
est vray qu'il n'y a pas beaucoup loing,

pour ce que voulant inciter nostre petit barbet, qui garde fidelement la marmite, ie me couche tousiours dans les cendres pour dormir mieux à mon ayse: Mais ie ne me suis pas mis en discours pour vous entretenir de ces niaiseries, ie ne fay pas de peu de chose si grand cas: Il est question de traiter vne bien autre matiere qui est la guerre: La guerre, ô chose espouuantable! quand on ne scauroit mourir sans qu'il en couste la vie. O guerre qui enrichist les vns & appauurist les autres! O guerre qui agrandist les vns & rabbaïsse les autres! O guerre qui fais tort à l'vn & profit à l'autre; que tu es meschante, ie voudrois le rencontrer, ou mon cousteau passeroit, ou ie luy donneroïs au sixiesme bouton. Combien de filles durant la guerre se laissent violer volontairement dedans Paris: combien de corps sont donnez à la trauerse; combien de pauvres vilageois debitent leur froment & leurs bleds plustost qu'ils ne voudroient: malheur par qui la guerre arriue, pour moy ie ne suis point querelleux, aussi ne seray ie iamais qu'un coquin: car en ce temps

cy il n'y a que les turbulents, & les brouillons qui l'emportent : mais le Diable les emporte bien souvent aussi. Or voulez vous sçauoir selon mon aduis qui sont ceux qui causent la guerre ? il me semble que ce n'est point d'autres gens que ceux qui ne peuvent bien faire leur profit durant la paix, & qui se plaisent à brouiller les cartes afin de faire fredon. A ce propos, il me souuient d'une plaisante & serieuse similitude que Gautier Garguille recitoit l'autre iour, disant que les chats ne sont iamais si aysees que quand on démesnage, pource qu'il s'eschappe tousiours quelque bonne lipée en arriere par la negligence de la chambriere, & si lors qu'on oste les meubles les rats & les souris demeurent à descouuert, & sont bien plus aysees à prendre : Qui sont les gros matous qui ne demandent que remuë mesnage ? ce sont ces gros milours aux pattes engluées, lesquels ne demandent qu'à chicaner, & prendre tout en vn iour ce que les pauvres petits larroneaux de rars ont amassé tout le temps de leur vie. Quand la guerre est, point de Chambre des Comptes, point de

point de Iustice : combien de gens y gagnent aux despens des autres. Les Officiers de chez le Roy font tant d'extraordinaires, les seruiteurs demandent tant de recompense, les Controolleurs font de si belles parties, qu'à la fin il se trouue que la guerre ne se faict que contre le Roy, & à la ruine de ses finances. Combien depuis peu de temps auons nous veu de leuées de bouclier ? & à quoy seruir ? contre qui faisoit-on la guerre ? Les Capitaines & les Chefs guerroyoient la bourse des riches Laboureurs, les soldats faisoient la guerre aux filles, & les pauvres Goujats se geloient au coing d'un buisson, attendant qu'il passast quelque pauvre poule pour l'estropier, cela n'est il pas beau au pris de s'entretuer l'un l'autre ? il faut bien qu'ils l'ayent trouué bon puis qu'ils veulent retourner : mais garde la teste, le retour est pire que Matines : ils prennent vn pretexte qui est de pau-effect. Parbieu encore que j'aye bien du mal & de la peine, ie ne murmure point contre mon maistre, qui aime mieux Turlupin que moy. Mais pour dire la verité, nous sommes des fols de nous amu-

ser aux affaires d'Estat, c'est ce qui gaste
 tout. Si les Moines ne se mesloient que
 de chanter, les Prestres de confesser, les
 Predicateurs de prescher cōtre les vices,
 les Docteurs de disputer de langue (ce
 n'est pas que ie veille dire qu'ils prennent
 les armes, non) & les Comediens des far-
 ces, parbieu nous n'aurions pas tant de
 mal: Mais à cest heure on respondra c'est
 la mode, il n'y a personne qui n'y mette
 le nez, il ny a si petit frere coupechou qui
 ne veille entrer au Louvre, il n'y a haran-
 gere qui ne se messe de parler de la guer-
 re & de la paix: les crocheteurs au coing
 des ruës font des panegyriques & des in-
 uectiues: l'un louë mōsieur d'Espernon,
 l'autre le blasme: Ha que vous estes fols,
 laissons tout cela, rotissez vos harancs, &
 chastrez vos fagots de par le Diable. Les
 grands s'accordent tousiours bien, les
 petits qui sont si fols que de se mesler de
 leurs affaires paruiennent à la fin, mais
 c'est au bout d'une potence. Iamais le
 Royaume n'a esté plus florissant que du
 temps du feu Roy, pour ce que dans sa
 seule ceruelle se contenoient toutes les
 affaires d'estat. Personne ne murmuroit,

personne ne cauſoit, chacun viuoit gaye-
 ment de ſon meſtier. Mais depuis que
 les Moynes ont eſté à cheual, que les
 huguenots ont fait des ſynodes, que les
 Religieux ſont deuenus marchands &
 banquiers, par dieu nous n'auons eu que
 mal. Vn pauvre maluſtru d'Aduocat at-
 tendant qu'on luy apporte dans le Palais
 quelque cauſe à perdre, ſe promeine, diſ-
 courant des affaires d'eſtat, tantost de ce-
 ſtuy-cy, tantost de ceſtuy-là, meſdit de
 l'un, dit bien de l'autre, Ariſtarque les
 actions d'un chacun, & penſe que ſon o-
 pinion eſt plus valable, & ſon iugement
 plus ſolide, ſa ceruelle mieux tymbrée
 que celle du Roy ny de tout ſon Conſeil
 l'entends ce me ſemble vn vieil Aduo-
 cat crorté, ſes lunettes en main, ſon ſac
 & ſa queuë de l'autre, qui ſe tourmente,
 ſe trauaille l'eſprit que fera le Roy? d'Ef-
 pernon eſt bien forr. Le Roy n'a point
 de finance, & meſme la bourse du Roy à
 la ſiëne, & penſe qu'à que le Roy n'a pas
 demandé ſon aduiſ, que toutes choſes
 ne peuuent reüſſir. Vn Procureur affairé
 dira, au Diable d'Espéron, nous auons
 bien affaire de guerre, la bourse ſe deſ-

garnit, murmure contre le Roy, puis en fin se console & dit, nous aurons du mal, il nous faut payer vne grãd' somme d'argent, mais aussi les guerres feront tant de procès; tant de pauvres villageois ruinez, voudront rentrer dans leur bien, que si nous rempauvrissons, parbieu quelque iour nos enfans seront bien riches. Pendant que monsieur le Procureur se fasche en la salle du Palais, les gros larrons de luifs qui se promeinent en bas sur la place disent. Dieu mercy bon temps, Dieu vueille que le Roy pardonne bien tost à d'Espernõ, afin que d'icy à peu de temps il puisse encore rebrouiller les cartes; vn Gentil-homme à qui i'auois donné de l'argent sur gage a esté tué, l'enseigne de diamant m'est demeuree. L'autre dict, parbieu bon, le party de la recepte de l'argent n'est pas mauuais, nous pourrõs racler quelque chose. Vn autre haussant les espaulles dit. Ma foy il n'est rien tel que de pescher en eau trouble, nous presterons force argent, les interests seront grands, nous aurons les hardes de beaucoup de noblesse qui s'iront hazarder à la guerre, & se beaucoup tourmenter

pour prendre quelque maladie, cependant que nous mangeons icy à nostre ayse, & boirons à leurs bonnes graces, apres auoir decreté leurs maisons & vendu tous leurs biés. Voila comme chacun ne songe qu'à son profit particulier, & qu'auourd'huy pour vn sol la pluspart trahiroient & leur ville & leur Roy, d'ou prouient cela? c'est que sa bonté le faict mespriser. Ma foy quand ces gens auroient esté vn peu chastiez, ils n'en vaudroient que mieux. Pour moy, si l'on me demande ce qu'il me semble du temps, ie vous iure qu'il fait bien froid, & que Ieã Petit nous l'auoit bien prædit. Au reste pource qui est de d'Espernon ie luy conseillerois plustost de venir que de dōner la peine de l'aller querir, car il payera les pots cassez, bien souuent sous vne teste blanche il y a bien de la ceruelle verte. Ceux qui sont aupres du Roy, ie leur conseille des'y tenir, & ceux qui ont de l'argent de le garder, & se rire des autres, qui tenet tenet possessio valet. Ils seroiēt bien fols quand le Roy leur donne quelque chose s'ils le iettoient, il n'est si bel acquest que de don. Qui fait bien trouue

bien, le Roy a assez d'esprit pour cognoi-
 stre ce qui est à faire, sans estre subiet à
 rendre compte de ses actions à ces Mes-
 sieurs là. Ho que i'espere bien que mon
 party sera le plus fort; pource que le Roy
 est de mon costé, iamaïs on ne manque
 estant appuyé de luy, tous ces brouillôs,
 ces pestes, ces traistres, ils nous prepare-
 ront bien-tost vn beau sujet de Trage-
 die Dieu aidant, dont ils ioueront la ca-
 tastrophe, sur vn beau Theatre & en bel-
 le compagnie. Ha que ie les verray se-
 couër de bon courage ces mâtins qui
 veulent manger le bled en herbe, iem'e-
 stonnois bien s'ils estoient si long temps
 sans remuer, l'hiuer les en empeschoit;
 mais à ceste heure qu'il fait bon piller le
 bon homme: ils reuiennent avec les hy-
 rondelles, mais garde qu'auant que l'Esté
 soit passé, on ne les enuoye chauffer à
 l'autre monde. A propos on fait courir
 le bruit que les Anglois ont mis le pied à
 terre en France: mais si cela est, ils feront
 bien de se retirer, les oysons ne sçauroiẽt
 nager sur terre, ils faudroit qu'ils prin-
 sent leurs mittaines pour prendre Ca-
 lais, encores auroient ils bien froid aux

doits. Messieurs de Paris ont desia peur
d'aller aux portes, mais ils n'ont que fai-
re de craindre, on leur apportera la guer-
re & le subiet de la guerre bien-tost dans
vn carrosse à deux roues. C'est tous ce
que ie sçay de nouueau, car ie ne veux
rien dire d'auantage peut d'estre batu. La
souple me haste, i'entens desia ma mai-
stresse qui m'appelle. A Dieu bonnes
gens, encore que ie pense qu'il n'y en aye
gueres.

FIN.

[The page contains faint, illegible text, likely bleed-through from the reverse side.]